

四庫全書

集部

欽定四庫全書

渠菴集卷八

元 同恕 撰

誌銘

王府君墓誌銘

延祐五年四月二十有三日承德郎乾州知州濟南王  
琚母夫人趙氏卒將護柩歸松楸卜以某年七月二十  
日與其考府君合葬鄒平縣仁義鄉之北岡迺錄府君  
世次壽年求銘寔石余惟承德累仕闕輔治行卓偉禮

交義接積有歲年有不得而終辭者謹為叙次如左君  
諱禎字國祥世為濟南人高祖淮金懷遠大將軍濟南  
路州軍民千戶力濟時艱一方之民獨安田里曾祖彰  
金中大夫棣州厭次令出私積活荒歲民妣蘇氏鹿氏  
祖通讀書樂施妣高氏父孝友妣左氏府君以庚子歲  
八月十有三日生至性孝友宗戚隣里樂其樂憂其憂  
篤志問學無絲粟榮利計鄉閭子弟爭遣受學至元十  
四年五月二十有六日得疾遂不起壽止三十八夫人

趙氏金浦州千戶忠惠之女溫婉恭慎事舅姑得歡心  
接族姻無違禮府君既歿即屏去脂澤約身縮用力其  
子于學承德以是出典郡縣入贊臺憲才猷風節照映  
搢紳夫人鶴髮方瞳雍容祿養見者咨美今年七十有  
九微疾而逝子男二長承德也次珪甘肅等處行尚書  
省譯史前歿女一適都目李惟洪孫男三魯充鄒女五  
曾孫女二嗚呼府君儲休積美維嗇享于躬顯揚之傳  
方興未艾夫人苦節于其始而燕于其終天之報施善

人又可謂無信邪銘曰孰御陰陽變化無常一世之短  
百世之長非此其身府君是傷在其子孫府君不亡婉  
婉令配閨儀壹章同穴之信皦日其光

將仕郎趙君墓誌銘

將仕趙君諱元諒字良卿其先充之鄆城人祖諱義妣  
翟氏徙家隰州又徙家奉元故今為奉元人考諱吉字  
伯祥妣晉氏君以乙卯歲五月二十日生天資純謹經  
史通大義出掾開成宣慰司繇積閱勅主鳳扶風縣簿

歷安西徑陽縣官將仕佐郎延安總管府知事陝西都  
轉運鹽使司知事臨洮府司獄轉將仕郎奉元路司獄  
為簿能抑暴使以負重苦傳騎伸冤獄之罪死者佐運  
幕能使鹽丁盡力歲科倍常數其見於用者如此事親  
孝從兄順御下則恩義兼盡處家則勤儉有方利不苟  
取勢不苟合其本諸身者又如此以延祐己未正月十  
有六日卒壽六十有五卜以三月二十有七日葬長安  
縣華林鄉高陽原君凡四娶兩孺人晉氏舅女從姊也

李氏皆合祔焉今孺人邵氏佐君有賢稱子男三寅容  
宏女二長適雲南臨安路蒙古字教授苗彬次在室邵  
孺人予里中故家也遺其子寅以進士王弁狀來乞銘  
銘曰有用以及乎人有本以誠乎身不究於前者用之  
屯可裕乎後者本之真歸四天之斧墳尚永永其不泯  
任正卿妻曹節君墓誌銘

延祐七年九月辛卯京兆故任直諒正卿之妻曰曹節  
君疾終內寢享年八十有二親疏聞者咨嗟驚嘆謂節

君由震風凌雨之變而圖夏屋帡幪之安天助其順人  
與其能以濟成任氏者三世矣不易為力哉節君父諱  
用母王氏世河中人生十六而嫁時舅姑甫自亂離歸  
鄉里正卿與弟直忠年尚弱經始立門戶百用闕如節  
君以柔順恭恪事舅姑勤儉端一從夫子上下咸宜之  
十餘年間既喪舅姑正卿直忠相繼淪謝子謙纔七歲  
兩房五女襟前裾後族黨憂不能濟節君屏去脂澤衣  
麤食淡資其子以學撫視諸女慈愛教督均一無間家



事巨細不以委勞于娣氏娣氏亦友敬信順寢食必偕  
頃倡荒和至于白首人信其姊妹不知其為娣姒也始  
自謀曰農桑衣食之原無田以給口衆非久計也盡斥  
奩具買田南山下課童婢耕蠶甘苦共之寒暑不少懈  
歲入既贏子謙亦長大孝謹有鄉譽伏臘之計十百於  
疇昔矣人方歆羨不幸謙屬疾遂曠定省諸孫皆幼稚  
節君年已七十吞聲飲泣益自奮曰兒曹承氏祀者不  
使知學是由我敗之闢館于隣延士教之男今受室女

亦有歸歲時柔愿列侍左右初大德間有司上其行宜  
享旌表省檄既下節君辭曰婦人守義分內事爾何異  
焉至大辛亥通議大夫河南任公總管奉元也謂朝廷  
旌別淑慝所以美化移俗二母之行若此久聽其辭如  
盛典何趣有司樹表于門集賢學士勤齋蕭公題其上  
曰如曹娣索貞節嗚乎惟良顯哉一子謙也字敬叔三  
女皆嫁良士曰李思溫曰從仕郎王府照磨劉元曰醫  
効郎惠民局提點嚴有恒娣女二長適董思溫蚤世次

適司竹監使鄭思溫先六月而歿孫男三惟義惟一惟  
聰女二嫁王灼者亦前歿次許嫁鄭氏節君天性嚴重  
言笑有常度閨門之內大小肅穆識深慮遠有補陰教  
矜容街巧之習不入于家故女之事人者皆勤內職而  
子婦蚤寡誓志秉節耳濡目染之力歟自奉甚約至周  
人之急畧無顧惜嫁娣女資裝厚于已女其哭娣氏也  
哀不能勝其後竟以鄭女亡悲傷得疾御下慈祥自司  
閭政未嘗笞捶一人有過則累日不與之語恐懼謝罪

乃已凡此視昔著于彤史者優劣何如也至是惟義輩  
卜以十月庚午祔節君柩于咸寧縣龍首鄉永泰橋正  
鄉之墓泣拜請銘某惟義子備館教者累年禮遇之厚  
嘗竊愧焉今茲德述非某言之私鄉評之公也不敢畧  
亦不敢誣曾孫男一班巴爾銘曰於維節君得秀自天三  
世夫門力起其顛霜不逾清玉不逾堅婉婉娣姒光綴  
華聯生有聞于百年死無愧于九泉吁嗟乎婦賢吁嗟  
乎母賢

太醫常惟一墓誌銘

君諱中字惟一其先太原人曾祖明避亂徙陳州再徙  
中山祖慶祚以良醫待詔御藥至元十一年皇子安西  
王分土關中太醫院奏侍藩邸官醫愈郎陝西四川中  
興等路醫藥提點使司判官終王府醫藥提舉今遂家  
奉元父謙承事郎陝西興元等路齊哩克琨長官妣夫人  
杜氏君天資秀朗家學淵奧濟以心得之妙針藥所施  
効應神捷人無貴賤日爭迎謁遂以眼科名世入為御

醫居京師者十年延祐改元試中第一人扈從往來著  
績為多王公貴人無不稱善蓋術業精專而仁遜不矜  
故也至治元年二月十八日疾卒寓舍年甫四十有一  
以其年十月十五日歸葬奉元咸寧縣龍首鄉北原之  
塋娶王氏再娶陳氏承務郎龍興路推官某之子一女  
纔滿歲後五月亦歿嗚呼痛哉自予得友承事公而熟  
君及弟冲之賢每謂承事天壤間能是福者幾家積善  
餘慶信而有徵矧君濟世美勞王事命服歸榮匪朝伊

夕孰謂其遽至此也天不可信有如是邪冲來請銘其  
何可辭銘曰靈芝無根醴泉無源竭枯一朝世猶瑞寃  
鍾秀在人源深本蕃不濬而培天乎何言以物為形生  
雖有垠以瑞為名永永其存

郭君秉彛墓誌銘

延祐七年陝西行省行臺擇可魯齋書院主訓導者僉  
曰郭君秉彛文行純懿倦游開成真其人也於是遣邑  
吏走書幣以請三往返然後至既舍菜升講座樂育之

和盎溢几席間執經而問約禮而言者昧昧以進昭昭以退兩府謂得其賢學者謂得其師士林謂得其友甫三數月庠舍不能容矣至治改元之春瘍疾為虐竟不起二月十二日也嗚呼天果欲窮吾道邪何奪斯人之遽也使前日相慶者皆相吊來哭之慟自復及殯聲相屬弟彪時方以命省家開成友人王總管庭彥傳推官彥升經紀喪用衣衾棺斂必誠必信浹旬彪以其嫂王氏謀所以葬君者則持教授孫忠符狀乞銘于予予雖



拙於為言無以振發潛懿義不得辭也乃受而申之君諱好德自號鳩菴世居京兆華陰為儒家再徙咸寧考厚載之陝西等處打捕鷹房提舉妣王氏君生而穎悟蚤從蒙齋孟先生學能自淬礪讀書為文捷出時輩故人皆期以致遠大德戊戌開成路同知方君薦為安西王府說書會王受命北征開成貴家爭延訓子弟故君留居者餘二十年懃懃懇懇務以成就人材一方翕然得所矜式貧而願學者約已資之康生繼昌居門下五

年義則師教恩則骨肉故今繼昌喪之如父君蚤孤事  
母篤孝迎養致樂未嘗少違顏色侍疾四旬衣不解帶  
喪祭一遵禮制不忍以俗尚薄其親徒步千里護柩歸  
葬素雖不困酒母遺言敗德終身止飲兄弟間無違言  
忤色朋從友好信義尤著素善渭南曹顯道立聞其妻  
有娠約通婚姻既產曹男而已女歷十有八年顯道夫  
婦死已久矣君曰吾可失信於故友邪乃資其女婦曹  
氏庭彥之總管開成也以師禮遇君丙辰之變庭彥既

被執守者露刃脅以必從闔府吏卒奔散無一人君易衣冠伺間隙獨往省視庭彥曰吾分當死人殺如自殺何君勉之曰公知守大義當聽命於天無益之死不可為也庭彥每語人深感其義仁心周流終始無間嘗晨起有遺楮在門視之皆金帛其直不貲君求其人盡畀之六盤地寒日暮聞河側有悲哭不能為聲者君往視之拾薪兒凍幾死矣舁救於家明日還其父母蓋全吾降衷者類如此妻王舅氏女也側室梁氏三女一男長

壻吳用貴次即顯道子宗顏季尚幼男復方一歲季女  
及男梁出也享年五十三卜以三月九日葬咸寧縣笑  
蓉園之先塋君稽古務學履真踐實其積也若是之豐  
其取也乃若是之嗇邪是可哀已銘曰古稱仁者宜位  
而富位富未能必得其壽如何郭君三無一焉陽錯陰  
揉匪昔之天嗚呼秉彝扶善斯世籌德度功是亦有位  
含英咀華諸子百家淵淵其蓄用則孔多豈弟君子同  
聲萬口以是為年庶幾顏友玄房有石琢此銘章嗚呼

東曩可謂不亡

朝列大夫僉漢中道廉訪司事傅公墓誌銘

公諱昱字彥晦京兆華元縣人曾高而上世有隱德稱孝義家祖汝礪陝西都轉運司經歷妣李氏考巖起中順大夫江東建康道肅政廉訪使號擴齋集賢學士勤齋蕭某誌其墓妣咸陽太君張氏以公貴贈也生二子公與弟承直郎奉元路總管府推官杲俱以醇正守家法有聲搢紳間公自冠歲辟陝西漢中道廉訪司書吏

大德改元以貢掾工部二年轉樞密院令史既擢中書省掾端敏詳慎無絲髮過兩府爭延譽之滿歲勅官承務郎工部主事綜藝課功冬卿倚信焉至大元年陞奉訓大夫陝西等處行尚書省左右司都事未幾改行中書省都事蓋翺翔京秩者二十年展用鄉邦人甚榮之公益自澡濯期光前武究心曹務詳整為百司倡上信下服御史司臺尋以清望可肅風紀奏加奉直江南諸道行御史臺監察御史按行廣東雖窮荒瘴毒之地身

皆厯之無所顧避一善必登一惡必黜風威肅然行臺以舉職薦即拜都事延祐二年超朝列大夫居今職明練治體正身率下不事苛細吏民稱頌焉歲除移疾還家屏棄餘務專精醫藥疾已時與親賓談笑道舊故為樂人皆期公旦暮當復用世至治辛酉夏四月九日忽感疾須臾而逝享年六十八鄉士大夫來弔者哭必盡哀卜以其月三十日葬長安縣義陽鄉槐衙先塋先夫人楊氏祔贈太子少保潛齋文公之女懿德宜家今夫

人耶律氏中書左丞埒克之孫克盡婦道封咸陽縣君  
二男曰順曰鐵牛耶律氏出也二女長適刑部掾馬榮  
祖次適劉克敬公天資端靜寡言笑好學力行務見實  
用於書無不讀尤嗜易學又以餘力攷求法律本末使  
不誤於操縱中順將終遺言孝弟忠信揚名顯親為能  
子公敬服不怠居家治官見諸日用者皆是物也事宋  
夫人能得懽心人不知其為繼母叔父客死廣東還自  
南臺護柩返葬簿錄遺財歸其家初公疾既瘳適弟杲



亦滿秩日集外齋講論經史商畧古今課子侄讀書驩  
然粲然恩文兩盡取友必端無汎交雜游清約自怡有  
無不恤也嗚呼善繼善述有如此者真不負能子之託  
矣而位不滿能年不輔德惜哉承直以予游公兄弟間  
手府學正玉璫狀請誌其墓謹第錄如右而系之以銘  
曰底法之基不難乎前堂構是期難乎令傳猗歟朝列  
矩方規圓擴齋堂堂允為象賢孰參省幕孰蒞臺聯朝  
議頡頏舍公孰先宦學既昭家聲亦宣天於斯人胡不

百年槐衙之阡草露林烟銘紀諸幽以告邇綿

耿彥清墓誌銘

至治元年七月承德郎肅州路府判耿君彥清以疾還  
奉元之里第決旬遂不起二十一日也既殯舅氏尚君  
彥誠導其孤某乞銘于予曰前幸銘其父矣敢以是并  
累子既不得辭則叙之曰君諱廷望彥清字也世為奉  
元人祖諱舜妣王氏考諱復亨贈承務郎妣尚氏贈恭  
人君生至元甲子三月十二日於次為仲早自植立從

吏師之廉而平者習文法濟以勤敏聲稱右儔輩陝西  
行尚書省選副掌儀局後二年以能舉職受安西王教  
既擢掾行尚書省改中書省繇掾陞提控大德八年勅  
從仕郎尹延安延川縣厯承事郎陝西行省管勾兼架  
閣庫承務郎甘肅行省管勾兼架閣庫延祐五年加承  
德受今職享年五十有八元配蔣氏前君三十三年卒  
繼室李氏贈恭人卒今七年矣再娶劉氏封恭人子男  
三曰某女二長適高陵縣尉王欽亦前歿次尚幼卜以

其年九月十五日葬君咸寧縣龍首鄉孟村先塋蔣氏  
李氏祔君少孤自力于學事母能得其歡心天資強明  
遇事審慎操筆行省者首尾餘十年有譽無疵其為縣  
也惠利必興刑罰必當民有訴其夫赴兄之招數月不  
歸者同僚或疑之君獨燭婦冤捕治具服蓋杯酒失意  
毆死而井其尸其在肅州治行尤著他事糾紛不能決  
者上官委辦前後畚至此君已試之大凡也即其所已  
試而知其未試者尚富有也嗚呼惜哉銘曰志行之卓

才識之強左右吾用允曰吏良維後有裕前亦有光孰  
匪九原奚憾斯歲勿替而引善繼之望

李君文卿墓誌銘

至治元年冬十二月五日乾士字文鐸振之來謂予曰  
武功李文卿先生以十一月十五日疾卒于家鐸友其  
子叔謙則往弔焉既致慰矣叔謙又哭拜稽顙跪而言  
曰先君卜以十二月二十一日葬周鄉五渠磴先塋先  
君之友今惟同賚善公在誌墓之辭舍公其孰歸叔謙

罪逆餘喘忍死朝夕不能遽違殯次匍匐往請振之能  
為致此懇乎鐸既許諾是以來也予聞而驚呼為之泣  
曰前年文卿來留止三數日握手道舊故為笑樂鬚髮  
猶白黑相半神氣清徹顏如渥丹予謂文卿福壽未艾  
也孰謂此為終天之別耶嗚呼悲乎文卿諱斐其先鳳  
翔人祖諱義妣杜氏始家京兆之長安考諱秀妣王氏  
張氏再徙武功昆弟五人文卿居長慈祥孝友出於天  
性事母張氏不知其為繼也勤以幹蠱儉以自奉其聞

善也汲汲如不及其接物也休休如有容以故親踈貴賤皆愛重之敏而嗜學不懈寒暑六經史傳厯厯成誦間為辭章清婉可愛無泛交雜游一以誠敬為主在長安日獨與竇隱君長卿雷都司季正及予相往來文史之娛迨老不厭至元中陝西行省察其廉慎有心計兩檄領興元鳳翔稅司大德三年又檄領司竹監課集如期非所好也享年七十妻文氏柔順恭恪克相夫子子男五叔謙餘皆前卒女二長亦卒次適張璞孫男二衍

衡女四周德趙思弼其婿也餘幼銘曰知圓義方仁愛  
禮恭均由性有匪賢曷充猗嗟文卿盛美在躬勉勉循  
循一其初終七十為年壽非不融有子有孫吉非不逢  
相彼周原泉深土豐有斧其丘德人之宮

儒林郎馮君墓誌銘

至治元年辛酉封儒林郎馮君義年八十四以十月九  
日卒二年壬戌其妻恭人秦氏年八十四以正月七日  
卒蓋生同戊戌而為夫婦者六十有八年壽祺之事恭



人雖差延一歲由辛酉之十迨壬戌之正纔三月耳立春猶後四日是死亦同辛酉也長子翼霄時為樞密院經歷聞喪來奔甫及門而母氏卒卜以二月十有一日葬奉元咸寧縣春明門先塋同穴之期日不再吉嗚呼此可謂同生復同死矣天壤間生民不為不多富而貴者不為不衆若儒林夫婦結髮偕老生順死安幾何人哉借曰天作之合而能者養之以福固非偶然也經歷辱與予游泣拜以墓銘為請辭不獲命乃按事述而叙

之君諱義其先慶陽人祖某父秀儀觀雄偉金末從軍  
以挽強為衆所推其後轉徙平陽亂定西歸始家奉元  
乃輦父喪慶陽葬今春明門之塋為始祖焉妣馬氏生  
四男君為仲子天性孝友竭力以養父母不使其勞  
兄貴窘乏輒振業之公賦雜擾不以相及歿則與其嫂  
合葬焉二弟頤慶幼以成學長以成室皆已力頤今為  
南漳縣尹恭人家素貧君為買屋迎養其祖父母歿又  
營葬禮治鄉鄰信孚朋友蚤業商賈剛直好義凡利交

者有取無怨行旅往來不能以歸必贖遺之故人無遠  
近親疎皆愛重焉敬恭神祇朝夕熏修迨老如一日恭  
人早孤母郭氏年十有七歸儒林淑慎端潔事舅姑以  
孝謹相夫子以勤儉衣服飲食之須蠶桑織績之務躬  
自劬瘁不以委人儒林得以專理外事獲愛於宗族鄉  
黨者恭人之助與為多焉叔慶生乏乳飲恭人乳之撫  
有二子慈不失義督之就學至斥奩具以奉師儒故今  
卓卓以有見於世者如此恭人之教也生子四男二翼

霄承德郎樞密院經歷翼雲陝西漢中道肅政廉訪司  
書吏女二務使姚信咸寧尉吏田榮其婿也孫男五某  
某女二長適太平路教授劉惟孝次在室延祐乙卯朝  
廷推恩臣下以勸忠孝文武內外官皆許褒封父母經  
歷以中左司都事於是有儒林恭人之命及來為陝西  
行省幕長二老人者拜恩家庭龐眉鶴髮夫前婦後及  
門賀者上而省臺下而鄉里搢紳韋布之士肩摩踵接  
莫不咨賞歎息願有子如經歷有父母如儒林恭人也

嗚呼積孝累義克有令子殊恩異數增華耄年考終厥命二壽同歸世所願欲一無憾矣是宜銘銘曰良人者何曰和而義柔而能正婦德之懿嘉耦曰配古難其逢儒林恭人斯媼斯翁天錫賢子鵷聯鸞筵遂都榮名以燕眉壽樂哉九原二壽同藏勸善有銘無窮是彰

封奉議大夫張君墓誌銘

君諱德明字彥明世為耀之三原人祖順妣馬氏考貴魁偉好義有稱族黨間壽八十四以終太子諭德勤齋

蕭公為碣其墓凡三配孟氏楊氏君之母白氏壽亦八十八君淳誠靖厚早知讀書遵軌度篤於愛親不忍暫去左右名宦所趨未嘗萌念及代家政輕財重義先人後己曰此吾父宿昔所事不敢忘也宗族鄉黨均憂共樂張某家貧嫁娶仍數積負久而為數夥一不責償縣人李巴子雲陽李二皆僕隸事人謀欲民成其家聞君之風往請焉即以楮錢萬有千緡畀之且為經紀生業豈特出濟人利物之本心而然歟亦無改於父之道為

孟莊子孝也又其大者謂師道不崇無以裨教化善風俗乃捐金倡縣侯買地龍橋鎮東南為畝若干創夫子廟締構像設之費出已力者又十之五遠近觀感爭遣子弟讀書庠聲序音相聞蔚有士俗茲非由君能仁有以發之耶治家勤而有節儉而中禮祭祀致孝燕享致豐誠以與人敬以持已鄉邦無賢愚皆推為長者名公鉅人蓋嘗紀贊其行教飭諸子擇賢師友與之游處使知古人修身之學故四子皆植植有立而季子世榮尤

允物望僉海北廣東道肅政廉訪司事君由是得封奉  
議大夫信州路鉛山州知州驍騎尉涇陽縣子受封之  
日親踈遠近莫不榮賀謂天道雖曰好還而享有備福  
蓋千百而不一二得也至治二年二月二十有七日疾  
終正寢壽七十有九配李氏贈涇陽縣君笄年歸奉議  
柔順恭恪克修內事前十二年卒子男四世英同知鐵  
州軍民事世昌敦武校尉禮店文州蒙古漢軍西蕃軍  
民千戶所副千戶世傑承務郎同知松潘客壘威茂等



處軍民安撫使世榮承務郎僉憲也女二長適王某次適朱安仁孫男五信儼俊儼燕孫女十曾孫男二女二世英等將以是年五月九日與其母涇陽縣君合葬於縣之常平鄉悌友村祖塋之次俾世昌子儼來謁銘奉議長予十歲辱以禮接歲時遣子若孫相問勞絡繹不絕此意厚矣其敢以蕪陋辭銘曰乾父坤母孰匪其子疾痛在躬昌間彼已維奉議君洞識天畀推吾是心以濟前美誦聲洋洋我鄉我里德風一行庶善草靡四孝

聯飛家聲日起夫誰使然神監昭只既服榮名亦膺壽  
祉不亡者存百世令軌

渠菴集卷八

欽定四庫全書

槧菴集卷九

元 同恕 撰

誌銘

司竹監提領鄭君墓誌銘

君姓鄭氏諱思溫字彥容世家京兆曾祖安仁妣李氏  
祖珍妣呂氏生三子長曰鈞平陽路拘摧解鹽副使君  
之考也妣曹氏生而淳靖端謹不妄言笑祖父母鍾愛  
之常曰能世吾家者必此兒也既就學日受業必精熟

然後已同硯席者戲笑於其側若不聞知或犯之亦不與校鄉先生每舉以鴈不率教者年甫及冠家事巨細即能以身任不勞其父篤實勤敏綜理周密故祖父母樂其有後而拘摧君安享終身焉蓋君資受殊常生長富驕而恭儉自將不踐舊迹而動皆中禮事繼母趙宗族稱孝異母弟思恭不安序教君一接以友愛進之宦學供應備至其卒也哭之如同生內而宗親外而姻戚與凡鄉黨鄰里之交情文孚洽微我有咎行省察其有

鄉譽可任使也檄為京兆路解鹽倉使歷總庫副使者  
再司行鹽使領者再皆以集辦稱至治二年七月十有  
二日疾卒長安縣之居第享年六十有七初娶王氏同  
州判官鑄之女生男一曰耀女一嫁張珍皆先歿再娶  
任氏前二年卒生男二曰巽曰允孫男二女一巽以其  
年十月初六日庚午葬君咸寧縣白鹿鄉白鹿原宋庄  
新塋王氏任氏祔以予與君嘗同遊頤齋張先生之門  
泣拜請銘義不可辭迺為銘曰播構兢兢祖武是繩孝

友蒸蒸家道以寧鄉無疵議宗有賢稱展如彥容可曰  
德成相彼鹿原山環水縈四尺之封尚固千齡

李登仕墓誌銘

君諱餘慶字某其先威寧人曾祖英金天成縣尹祖資  
祿壬申歲偕劉忠順公歸義太祖皇帝詔為四川征行  
千戶佩銀符遂來關中占籍奉元有子八人祖妣關氏  
生二子長義襲職千戶次祥君之考也義死王事以祥  
世其職沈勇好謀數戰有功賞換金符兄子世昌既成

長讓職家居優游終老年八十七以卒妣毛氏君生而  
純秀練達時務安西王胙土於秦辟相府使臣至元十  
七年詔王相李忠宣公赴思播分黃平鎮遠田以君從  
行至則招攜懷遠君亦與有力勞勅將仕佐郎主安西  
富平縣簿十九年也再主郃陽縣簿厯錄事司判官轉  
登仕佐郎興元路金州判官年四十八以大德四年六  
月十五日卒君天性孝慈寬裕有容在官以勤慎篤實  
為主本明悟先覺人亦莫之能欺故上官信任不疑而



民之被其惠利者久而後益知其不可復得也輕財重義一諾之許千金不移嗚呼才用未周天遽奪之得不為良士惜乎妻張氏柔賢宜家有稱嫻族後君廿二年當至治二年八月廿五日卒壽七十有二子男四長泰將仕郎涇州判官次萃早世次革寶儀庫大使次昇秦州豐積庫大使前母氏一月卒女一適曹季文孫男八女五惟李氏先塋在咸寧縣宣平坊兆域迫隘不可復祔將仕乃卜地於龍首鄉神谷子別業以至治二年十

一月廿八日徙其祖考妣為新塋始祖考登仕洎母張氏之喪合葬焉前事介吾友安君士寧來乞銘乃為銘曰李氏之先世以勞顯維登仕君遺跡吏選其心休休其躬勉勉上信下懷官議無貶謂日千里驥足是展纔佐一州遽誦知免龍首新阡葬從父寔咨爾後人遺休之衍

封承直郎國子監丞李公墓誌銘

泰定三年秋八月十有四日承直郎國子監丞李公卒

年八十有二遠近聞者莫不驚惋嘆息謂老成云亡安  
所矜式蓋善信之美積躬者厚儀形之瞻服德者深也  
公諱禎字善之其先上京黃龍曲江人由其祖稅使君  
自河南寶豐徙家安西爵世名行具懔齋先生楊君教  
授誌墓之言考諱珪安西府軍器庫大使妣史氏生二  
子公其仲也端謹溫厚由性而然自幼學至冠昏未嘗  
有子弟過以貽父母憂孝友純至父母既歿事其兄如  
事其父兄長公六歲迄今率三五日一往候之敬順有

加高曾而下皆以勇略著名當世稅使君嘗中金武舉  
至公獨儒雅自將雖詩書家子孫皆自以為不及神秀  
內裕遇事明審吏學應務有餘起家將仕佐郎陝西五  
路蒙古鄂勒總管府經歷非所好也至元戊子興元有  
囚罪當死朝廷遣使臨決行省檄公偕往至則公具得  
其情蓋因毆妻誤傷主母非故也獄辭再上刑部卒論  
減死用心忠敬舉此可見秩滿即營治別業極力教子  
為終老計時年未五十作亭面南山竹樹環拱日讀書

其中自號雲中間叟當其適意時輒有詩歌陶寫襟靈  
未嘗出以示人人或得之意必高人勝士天機醇深者  
之言初不知為公筆也時居城中賓禮交舊杖屨往來  
言笑衍衍略無老人倦勤意度進止益恭儉而用禮以  
持其家嚴而有恩以御其下內外之治整如肅如諸子  
競爽方昌於用泰定甲子以仲子貴享有是封歲時列  
侍左右命服上壽中和之氣薰然一堂箕疇五福公獨  
多焉豈弟君子福祿攸降信哉斯言至是得微疾遂以

不起元配劉氏贈恭人淑慎婉德先三十四年卒繼室  
茹氏封恭人亦前二年卒子男五秉彛從仕郎奉先路  
醴泉縣尹秉中承直郎內臺監察御史僉陝西漢中道  
肅政廉訪司事秉義河西隴北道肅政廉訪司掾秉元  
篤學蚤世集賢大學士方齊郭公為作哀辭秉新輩昌  
總帥府奏差女一適張德皆劉出也孫男五溫良恭挺  
保溫恭亦蚤世女三二適良族一尚幼曾孫男二八十  
寔寔從仕兄弟卜以其年九月廿日葬公長安縣義陽

鄉北里先塋恭人劉茹祔焉前事衰經踵門拜且泣曰  
先人墓石不可無辭知先人者莫若先生幸哀而賜之  
銘某辱公忘年禮接獲預交遊之末迺不敢終辭敬為  
銘曰天維顯思日監在茲哉者培之夫豈吾私維承直  
公金良玉美惓惓名場恂恂鄉里詩書詠歌我性我情  
禮義綢繆我友我朋安享褒封有賢諸子祿養雍容紆  
朱曳紫八十二年百順斯全葬從其先夫何憾焉

耶律濮國威愍公墓誌銘

公遼人諱蒙固岱太傅濮國公諱珠格之孫太傅濮國  
公諱寶童之家嗣妣夫人聶赫氏以庚戌歲九月二十  
日生公京兆治九耀里沈雄有膽略才稱一世中統元  
年公徙居蜀第未冠拜懷遠大將軍管軍萬戶時朝廷  
方有事西南蜀城猶未盡下公奮武出奇下重慶瀘州  
諸城戰勞居多至元二十一年遷雲南都元帥引兵萬  
人攻緬夷轉鬪深入殺擄諸種幾盡二十四年浮海攻  
交趾大破其軍奪戰艦千艘夷卒水死者十六七鎮南



王賞金幣副鱣以旌其能大德四年超鎮國上將軍大理金齒等處宣慰使都元帥以功獲上賜白金五十兩金幣副鱣一金鞍一九年將兵二萬征普安臨安諸蠻晝夜不解甲一日之間合戰者九破軍殺帥不可數計賊勢遂不復振十年援驃騎衛上將軍遙授行中書省左丞行大理金齒等處宣慰使都元帥上嘉其服勞動遠又獲賜金幣副鱣二公久居瘴地感觸成疾遂以十一年四月八日卒于軍享年五十有八其地則雲南大

吉州也公結髮從軍為年四十嚴部伍謹訓練信賞必  
罰識機知變休兵則愛克厥威臨敵則威克厥愛以故  
士卒精白一心樂與輸力戰勝攻取未嘗挫衄上有以  
暢皇威下有以光祖烈斯所謂忠孝兩盡者非耶皇慶  
二年贈公龍虎衛上將軍行省平章政事濮國公諡威  
愍先夫人梁氏四川千戶某之女無子夫人王氏咨議  
英之長女封濮國太夫人勤明淑慎習訓儒家威愍既  
許身殉國不遑問家事日用益窘夫人冒寒暑躬先婢

使紡績織絰以佐寡乏又時遣人送鞍馬給邊費使威  
愍無內顧之憂延師教子禮族接賓無一不得其宜嗚  
呼賢哉後公八年當延祐二年六月二十六日卒成都  
居第之內寢壽六十有四生子二人長和尼齊宣武將  
軍船橋萬戶府達魯噶齊次旺扎勒布哈懷遠大將軍雲  
南諸路軍馬右副都元帥蚤卒孫男二宣武將以泰定  
四年閏九月二十一日葬公咸寧縣洪固鄉韋曲村太  
傅墓次梁夫人王夫人祔焉先事拜懇請銘某不得辭

也謹為次第之銘曰鳳不產堆麟不生羊烈烈威愍太  
傳之光髡彼兩髦奮迹戎行首事西蜀我武惟揚緬趾  
兩安此界爾疆白羽一麾藩撤籬亡寵錫便蕃奏功廟  
堂熊旗旆旆虎節煌煌如何昊天奪我將良三軍縞素  
霧慘雲傷篤哉孝嗣歸骨先藏琢詩玄石奕葉垂芳

李君和甫墓誌銘

君諱用字和甫姓李氏其先太原文水人由其祖雪谿  
公兵後徙籍晉寧至和甫始家奉元高祖順曾祖寬祖

庭秀河東行中書省左右司郎中號雪谿有子八和甫之考思義行第七妣劉氏蚤卒和甫明敏謙慎臨事不苟自幼而然年方踰冠悼其家運中衰諸父伯季死亡幾盡其父又轉客潭州不得以時歸輒感憤掇拾遺餘服賈西來關中土壤深厚水泉甘美慨然有再家之志遂輦致妻子當涉湖湘以迎親為事至則口累頗衆親意重遷而道里之費無所於取謂和甫曰我思見而婦而子輩然後同歸何如和甫恐傷親意再挈妻子就養

于潭閱年六七航海厯交趾諸國貨入優裕私自慶曰  
有以資吾父矣持還上之得侍以歸恭敬子職十餘年  
間日之晨昏時之寒暑不使其親意有小不得者其歿  
也買地咸寧縣龍首鄉鐵爐坳西原喪葬之具必誠必  
信又竭其力徙晉寧之藏雪谿而下十八喪與其父族  
葬之此其為孝何如也與人交以忠信不欺為主寧人  
負我無我負人故凡與共事者久而益相敬愛在潭州  
日知鬻茶可為業率數歲一往返茶戶夏南鄉以茶數

百引委和甫并售奉元約曰明年我當往受直閱再歲  
不果來聞其人已死和甫謂人以信士待我我以信士  
報之悲索緡錢送至其家其守義不回類如此鄰里鄉  
黨均憂共樂享年六十以泰定四年冬十月二十一日  
疾卒于家妻張氏淑慎能孝克相夫賢子男三長德輝  
次某某女四長適徐敬次偕蚤世德輝將以其年十二  
月三日葬君鐵爐原墓次前事來請銘泣拜言曰先君  
之葬曾祖也嘗句言門下以表墓道先君艱難創業積

功累善先生實知之不勒諸石以慰泉壤德輝不孝之中又不孝焉何名為子先生其哀之予素竒和甫為人事行可書者非一姑掇其大者著而論之曰孟子有言事孰為大事親為大守孰為大守身為大嗟哉和甫弱歲毅然志在立家跋涉萬里悉智畢力而能卒歸其親娛養終身收亡合散使祖魂宗魄永安乎深厚薈蔚之地可謂能事親矣仁義忠信以實其內謙卑巽順以華其外不謫不瀆無怨無惡蓋棺之日主鄉論者謂百年



之生獨和甫為完人可謂能守矣獨其年之不羸若可憾者蓋二五錯綜誰實司之在和甫則無憾焉是為銘

故張君彥諱墓誌銘

至元丙子王師問罪江南大州小邑四民子弟無少長悉為人所俘獲流離播遷之餘可矜可哀益不勝道能卒完其身於素患難者千百不一二見況能以亡國之末裔為起家之始祖有田有廬復修祀事于日月光華之世如吾張君彥諱者可兩有乎孟子謂人之有德慧

術智者恒存乎疾疾揆諸彥諶信矣哉君諱誠字彥諶  
以彥卿行襲諱故也信州上饒焦石里人高祖五十六  
公曾祖小二公祖省二公考省十六公妣陳氏君孩提  
失父獨依母居年十三遭亂來關中母子由是不相聞  
知恪謹小心服勤鉅家鉅家愛之如子弟機警敏悟周  
知四方物土美惡觀時取予不失毫分遂致饒用每言  
及母未嘗不流涕上饒距關中七千餘里行商往來率  
數歲一至必厚禮哀懇俾詢母存亡大德初君既得自

便葉姓兄弟至知母陳在家卧疾聞有子信感極遂不起君號慟者累日輒奔往以其喪祔焦石十六公之墓益重先塋不敢以兩親之柩北徙其得禮哉族喪在殯皆為葬之從弟福四過時不婚禮娶良家田廬為他姓有者悉購得之規為祭田終喪三年然後歸買田下邳為子孫遠業田租取鄉例之半凶年飢歲緩責紓逋嚴于教子資其讀書籍員國學閨門之內以身為準賓祭慶弔品節得宜豐儉中禮尊賢敬老道過餘杭日國中

耆儒孫敬禮之子伯明遠遊不能歸告之于君君念此  
老無他子姓備養分橐錙千五百緡畀之迄終養不責  
償年踰五十慨然嘆曰人壽幾何乃終役于物邪即以  
家事付其子優游自適士大夫亦樂與之交致和改元  
五月十一日疾終肅清里之居第享年六十有五以其  
年七月二十有四日葬咸寧縣洪固鄉樂遊園新塋妻  
朱氏子男四淳遵遺訓泐蚤天冲力學有聞兩預鄉薦  
女二長適耶律諒亦前逝次適石克禮君天資淵實濟

以明亮文史醫卜之用亦領其要雖善心計未嘗以得失為累始有居積為里中兒盜去君初若不知既出其物以市衆謂宜訟之官君曰慢藏誨盜我之過也其性度如此至是冲由刑部掾來奔喪錄君行實求銘于予予辱君禮接嘗與冲從事於講習間所不得辭也銘曰飄風振林本揭枝顛有栽者培天心可觀猗嗟張君奮由艱難人一己百惟力是殫我父我母松楸附安我子我孫桑梓計完孝無遺悔慈有令傳求若為生誰今百

年樂遊之塋肇自我先龜吉筮良之慶之延

承務郎西和州同知雷君墓誌銘

明道先生有言一命之士苟存心於愛物於人必有所  
濟進而上之其濟衆矣夫以仁存心然後愛物跡其職  
分觀其設施則人之仁不仁可知已若今之為吏能仁  
其職以厭衆心者雷君是也初為司獄守以廉勤行以  
公恕因有冤繫者君得其情必反覆白府屬俾申正之  
夏則洒掃囹圄冬則繕完藁籍守卒不敢肆為陵暴始

終十年如一日囚既受罰無輕重必致拜于前以謝矜  
愍省臺咨賞焉一正縣務再佐州事急於撫字緩於催  
科勸農桑以厚民生崇教化以正民俗扞擻無草竊之  
姦簿領無舞文之吏善類氣伸不仁者遠憲司才其能  
而潔其行它訟之疑誤積滯不能以時決者必委君裁  
處悉心窮審皆得情要最四十餘事嗚呼使任卿大夫  
之責達其道於四方何所事而不濟乎其子德誦手君  
行實且致遺命來請銘敢質諸見聞叙而論之用世本

末第錄如左君諱裕字順理耀州同官縣雷平川人曾  
祖遠徙居高陵之毗沙鎮祖定考貴卒鄜州洛川簿潛  
齋楊文康公為之銘妣杜氏兄弟六人君序居四明敏  
信厚生有淑質讀書力行志尚修遠至元甲申陝漢道  
宣慰司辟為奏差再擢四川等處行中書省宣使大德  
辛丑勅進義副尉安西路司獄皇慶癸丑改忠翊校尉  
成州判官延祐丙辰陞承事郎延安安定縣尹承務郎  
同知西州事泰定甲子也致和改元以年及致仕秋九



月十有七日疾卒于家十一月三日葬鎮北慶安鄉先  
塋妻路氏蚤卒繼張繼李子男八人德琳德諤德諄德  
議德諧德諧安定八兒女二人長適本位下總管李秀  
次適王文忠孫男九女四君族盛而蕃兄弟皆載名仕  
版孝友雍睦聞于鄉邦君在安西時味之嘉必遣至母  
所弟臨潼尉禎嘗病疫君即往省視又護居寓舍躬親  
粥藥如是者累月鄉黨朋友禮周義洽救災卹患出處  
如此是可銘已銘曰古之君子學道愛人史氏褒善筆

之曰循賢哉承務路義宅仁幽草亦知時有陽春于縣  
于州民氣以振余不負丞士論所均慶安之原有族其  
墳斯銘斯藏允無愧文

承事郎常謙墓誌銘

三代以降取人者類以奇偉豪俊為稱求之詩書但曰  
吉士良士常人善人蓋是四者名異而實同彼其慈祥  
豈弟溫厚和平天機固已不淺及究其用如菽粟布帛  
世可一日而無哉自予得友常君敬甫始終幾三十年

備五性之衷達五品之遜內外無一不宜者每竊幸歎  
古所謂良士吉士其可貴蓋如此皎皎其行以取聞直  
道之世所不與也壽享今七十有三當天厯二年二月  
二日卒藍田居寢之正仲子冲卜其年三月十有六日  
葬咸寧縣洪固鄉新開門北原先塋以刑部掾張冲叔  
靜狀來請銘君諱謙敬甫字也其先河內人曾祖榮祖  
繇太原徙中山祖晦邃於醫考慶祚盡得父學以目醫  
名世供奉太醫院至元十一年有旨侍皇子安西王邸

官醫愈郎王府醫藥提舉始徙家關中妣楊氏君生有  
淑質讀書穎悟過人能用先法提舉公以母老就養王  
教即擬君襲職大德元年擢從仕郎開成路總管府判  
官皇慶二年改承事郎華陽新津民匠長官疾辭不赴  
延祐四年以故官授陝西興元長官滿歲即謝事歸老  
玉山別業衣勤食力休休自將若不預世故者如是十  
有餘年配杜氏淑慎恭儉有美族姻前君十一年卒今  
合葬焉子男二長曰中夾邁善學御藥試中第一人仁

廟嘗賞其能將被命服而歿識者痛惜之次曰冲有行  
有文縉紳推重三辟魯齋書院山長女一適趙氏子育  
孫男二規矩女三長許嫁裴氏餘在室君易直有容言  
由心出已未嘗負人亦未嘗虞人欺已鍼藥之功貴賤  
如一主於救患不以媒利遠近交際皆推為信厚長者  
至性孝友兩親年皆耄老先意承志動中所欲在開成  
日聞提舉公有微疾輒棄官歸家飲食藥餌必親嘗拜  
奠祭祀必如禮篤愛弟謀恩文曲盡教子力學慈不掩

義善遇僮使未嘗輕肆怒罵曰均是人也上芥視之不  
已甚乎其原於此心者類若是議者謂君積之甚豐取  
之甚嗇造物之用不幾於儉乎然永錫祚胤有賢以昌  
厥後其福善固不淺矣銘曰仰事俯育孝而慈居官守  
職公滅私以友則信弟則怡琴瑟靜好家室宜父書能  
讀傳奧微王邸籍籍聲四馳平生所履觀若斯謂之古  
士非君誰

奉訓大夫致仕雷君墓誌銘

天歷三年二月九日奉訓大夫耀州知州致仕雷君卒  
其子德誼等卜以三月十二日葬本縣慶安鄉塢原先  
塋持君行實來致哀懇曰兩叔父之葬得先生銘有以  
昭諸幽矣先君之銘舍先生其誰託予與君兄弟義識  
有素其何辭君諱禧字致福其先家耀州同官縣雷平  
川曾大父遠徙高陵縣毗沙鎮大父定金末逃難亂定  
來歸父貴筮仕至元初歷主四縣簿尉有聲稱潛齋楊  
文康公誌其墓以右致仕恩贈奉訓大夫華州知州飛


騎尉高陵縣男母杜氏高陵縣君君以甲寅歲八月二十日生兄弟六人君次居三在幼勤敏凝然如成人受學潛齋公之門朝程幕課不廢寒暑至元十九年王相府辟典藏司史二十五年勅奉天縣主簿兼尉三十一年調渭南縣大德四年官將仕佐郎主鄆縣簿九年改登仕佐郎主長安縣簿歷職四縣清整有加井聚撤守望之嚴犴獄無呻吟之繫縣政益精明而令長得毗助矣至大元年陞從仕郎藍田縣尹皇慶二年轉承事郎



尹三原縣君既正縣治首以裕民為務教養科條井井有法勤農桑使民有儲蓄而無水旱之憂謹庠序使民知禮義而無法禁之冒崇獎善良扶掖貧弱有古賢令之風行省行臺列上薦牘至治二年進承務郎同知金州事年及告老綸命超榮致仕恩數泰定三年也君天資溫厚勤整治尚安靜務使實惠及民不挾術以干譽故民皆愛戴既去懷思愈久而愈不忘吏亦感誨諭之誠不忍輕犯約束也謝事家居猶嗜書不倦間與親賓

談笑道舊故為樂待族黨恩義尤篤憂喜同之享年七十有七娶羅氏贈高陵縣君淑慎端靜克相夫賢前君五年卒子八人男三長德誼中部縣尉次德詢次德謙承務郎寧遠縣尹女五鄂勒千戶羅某馬某楊某劉某張某其婿也君兄弟子姪蕃衍秀茂藹藹著譽鄉評言積慶者必以高陵雷氏為口實銘曰為官擇人若稽前代曰守曰令其難其最邦之安危民之否泰母曰徒勞任孰與大奉訓恂恂唯其所在政簡刑清仁涵義漑鸞

枳曰棲製錦者再來形暮歌去有遺愛纔佐一州我日  
斯邁位不滿能時所同慨七十七年無怨無愁誰傳吏  
循我銘其槩



渠菴集卷九

欽定四庫全書

集部

槩菴集卷十一

詳校官庶吉士<sub>臣</sub>龍廷槐

侍讀臣孫球覆勘

謄錄舉人<sub>臣</sub>李憲喬

謄錄舉人<sub>臣</sub>楊炤

欽定四庫全書

渠菴集卷十

元 同恕 撰

頌

臨潼縣尹馬君去思頌

邑有劇易吏有能否生民慘舒之繫莫令為急京兆屬  
縣十二治稱難者有四曰咸寧曰長安咸寧之東曰臨  
潼長安之西曰咸陽咸長左右大府百為所資令或日  
不暇食然壓之以尊官令行禁止壯之以版籍賦散役

分苟有勤上恤下之心勢若不難為者咸陽之與臨潼  
雖均當東西孔道往來者之所出入咸陽去府為里四  
十輅傳所經不過一飯之頃輒去獨渭渡為須臾之擾  
耳乃若臨潼適行者一舍之中由朝廷故總司使出道  
東者十常七八且又故唐離宮華清溫泉所在侯王將  
相監司郡守東而西西而東者沐浴焉遊觀焉事嚴且  
更日稍緩則信宿其送往迎來日無虛時大則為安西  
邸朝覲齋祓之所然則供億之須力役之用視咸陽則

曹鄴視咸長則魯衛矣欲民之舒不尤難乎城郭市聚  
大邑一丘樊耳人不完衣居不完屋往往久於騷繹散  
之地土以故令之得是邑者勉勉自持不以罪去為幸  
其能使上歡下洽吏戢民恬取有制而用有節刑不煩  
而訟不作官則心服去則惠懷進義焉君百福一人也  
君以世族克自樹立受知左山商公一亞工事再倅州  
治矣以至元癸未六月實來首剡政之蠹民者異時經  
用官給緡錢三可支一餘悉賦之民仍不授符以避劾

吏旁緣為姦脅持巧取闔境無寧家君慮賦之則民傷  
不賦則官感乃隱覈滲漏及吏卒贖過金為市畜種給  
豪戶有牧地者歲約取字育之半人不病而反利矣醪  
醴之酤帳御之備下逮芻藁色色有法吏不得私時王  
相開府冠蓋雲合往來無間言而民安如故沈毅端審  
望之人畏吏毫髮不敢欺租賦必差戶之強弱徵役必  
均力之衆寡號令一出翕然無異辭尤精折獄囚無久  
繫或決之馬下皆含笑受罰上官竒其才疑獄輒屬君



按訊輕重情得邑民劉某利女氏貨誘使歸寧殺之中  
路沈其屍於河反誣舅姑為虐其婦使失所在有司以  
父必不賊子欲致舅姑法辯久不決君聽其辭察其色  
即指曰而殺而女斥取榜具遂歛服無他觀者駭愕咸  
以神目君退食蕭然門無雜客或病其寡乏弗敢餉也  
勞農觀學旌善別惡飾公宇以壯觀聽崇禮殿以本教  
化民皆有父之尊有母之親總司以治績薦擢本郡推  
官吏民奔餞肴酒盈路瞻望車塵皆號哭不忍歸嘗觀

為政者他事或可術致民心必不可倖得整暇或可有  
為肯綮必不能游刃法自心成功隨事著若公其能吏  
哉今令馬敦武某主簿楊某仰止高山光昭前德合辭  
俾其篆石某謂進義之徽蹤兩賢之樂善是皆宜書以  
勸來者屬筆於某其如不稱何主簿君妹壻也終不得  
以蕪陋辭乃採輿言為作頌曰先聖有言不患無位視  
所以立位則不愧表表進義粹美所鍾奮由紃綺矩步  
規蹤尹我潼民三年一日曷植而生曷樂而疾迺究迺

度迺紀迺綱迺牛我田迺蠶我桑如是而徯如是而賦  
定我章程吏或敢侮罪兮斯得枉兮斯申狴犴幽陰歛  
兮陽春絃歌載路百里之土雨暘無愆百里之天湛乎  
淵澄溫乎玉瑩我思古人卓魯其並驪山蒼蒼溫流湯  
湯清風穆如嗚呼不忘

贊

房母畫像贊

處為孝女出為孝婦求之閨門不一二有此淑慎其身

者所以為德之茂五子愉愉扶前持後孫曾卅人頡頏  
左右思永範於厥家象柔儀於繪副庶歲時之致嚴如  
瞻對乎壽母

張嘉議畫像贊

鬱鬱乎挺拔於歲寒者此松柏後凋之氣人得以見其  
形儀也淵淵乎渟渟於澤深者此川流不息之用人莫  
能測其心思也豈弟君子麟鳳其祥龍虎其威雖知周  
萬物道濟天下未極乎股肱耳目之資而憂民之憂樂

民之樂邁迹乎神明慈惠之師我思古人將孰與夷謂  
漢之趙張三王公則姑舍而不為若周之方叔召虎謂  
伯仲之間見公者公亦不得而辭之也嗚呼

李平章秋谷贊

於穆聖心全體太極好善忘勢前無古昔矧我師臣蚤  
侍經席眷注綢繆宜莫與匹迺濡瑞毫象儀是飾迺運  
寶鋒號局斯勒天巧焜煌山人說懌對敷顯休臣敢不  
力維此山人孔門之特道行與行無身有國昔也龍淵

以羽以翼今焉鳳池伊契伊稷培植太平仁膏義澤在  
谷滿谷孰匪秋獲猗歟盛明得士之吉萃萃萋萋以頌  
無數

雷季正畫像贊

愉愉乎其不敢惰者事親之經也侃侃乎其不可撓者與  
人之方也觀於此而有所得也亦足以想像其輝光也  
若夫學問之淵而黽勉如不及持守之固而奮迅以自  
彊則他日之著見粹然盎然者又豈鄙薄之所可量也

祈文

祈雨文

靈山巨區能興雲致雨所以相有司福生民也有司之不職罰有餘責矣今也自春徂夏雨不時若耕夫力作土壤深細束手仰視以待播種神於此時尚不加恤民將何依乎走祠致誠祈賜矜閔澤我饑民更後旬時不惟秋種失望夏麥之成亦無及矣神終無意於斯民乎惟神其念之

西嶽祈雨文

維大元致和元年七月二十二日某官敢昭告于西嶽  
金天大利順聖帝維天地以雄尊浩大之氣結而為山  
分鎮五方神之所分乃在西土是天以水旱豐凶疾疫  
災祥之變付之神嶽使通融消息以陰陽此下民也陝  
西行省所統近在眉睫之間几席之下尤神所易見也  
三四年來旱魃為虐有夏無秋有秋無夏饑吻嗷嗷益  
不勝苦今年之旱勢益酷烈麴麥之入僅具斗升自四  
月至于今七月雲雨之興曾不一二時赫日炎炎如焚



如燎黍稷之苗十死八九是無夏又無秋也民將何以  
為命乎麥秋之期近在旦夕看此氣象敢有準擬民今  
扶老攜幼流離播散縣邑為之一空某受聖天子之命  
撫治行省失政之罪其又奚言夙夜戰兢不敢寧處齋  
被一心徧禱羣祀兩月之久未獲昭答雲暫合而復開  
風隨怒而疾作豈上天之意未欲悔禍抑忱誠之感有  
所未至歟竊獨惟念獄神之靈實主此邦控訴煩瀆不  
專於是得不為昧其所乎是用奔走俯伏廟庭重言累

語瀝此危苦神其哀憫為衆請命納恒賜於六幽出伏  
陰於九地使千里之土浸淫澍澤垂死之民再萌生意  
則豈惟眇末之責庶幾少緩而神受天地之職以相吾  
君者亦可以盡其分矣謹告

祭文

祭王文振文

維至元二十八年同某謹奉香酒時菓之奠告于亡友  
嘉興府錄事判官文振王兄之靈曰嗚呼乾坤儲秀賦

予不羣鳥得為鳳獸得為麟百千年所一二其人下而  
顧顙上而淵參珪璋雖異良玉是均我兄之出孕厥精  
真爰自童丱克好人倫擇足而蹈擇口而云左經右史  
宵誦達晨迨知取舍非聖不遵波騰衆議萬仞嶙峋或  
圖于壁或揭于門臺觀縷察明善誠身內腴磅礴酬酢  
如春嘉陽小試民用以新于臺于府交口稱珍幡然歸  
養絕足措紳益紬舊學以究未醇惟我與兄蚤同硯席  
兄步十尋我不能尺不我是遺情好日密目眚為苛呻

吟一室枉駕來抒握手歎息示我新篇副以鄧菊毅子  
誦旁炎煩頓釋喟彼簞瓢絕塵莫及三復斯言可驗學  
力曾幾何時遽聞卧疾奮坐驚呼遺問是亟天不可忱  
奇禍竟即嗚呼痛哉德也何豐壽也何嗇曾是蕙蘭不  
如茨棘幾世幾年此氣復集嗚呼痛哉問不覘形哭不  
撫簣頃刻衡茅終天永隔我罪何言我情何極酌觴几  
筵雷號雨泣靈兮昭昭克監予臆尚饗

告廟祭文

維至大四年八月日孝孫恕敢昭告于高曾祖考府君  
高曾祖妣夫人恕以二十二日蒙恩授儒林郎國子司  
業恕不孝不能蚤自植立以承先訓無學無才叨被寵  
命微先德而敷祐之豈宜有此奉受之初追念罔極不  
勝痛感謹以清酌庶羞用伸虔告伏惟尚饗

顯考改主祭文

維年月日孝子恕敢昭告于顯考玉山先生顯妣張氏  
夫人奉四月日制書贈顯考亞中大夫集賢直學士輕

車都尉追封京兆郡候顯妣京兆夫人恕不孝罪深不能奉承先訓蚤自樹立以備一日之祿養晚叨召命備員春宮適遇國家需恩幽顯以勸忠孝有此褒贈義教所賴也德廕所及也永惟惡逆不如無生嗚呼痛哉謹白

亡妻改主祭文

維年月日夫恕敢昭告于顯嬪朱氏夫人奉四月日制書追封汝京兆郡夫人恕以延祐六年祇奉召命備位

宮臣國家恩及幽漠有此褒贈生同其艱而不得同其  
慶哀可言邪謹告

渠菴集卷十



欽定四庫全書

渠菴集卷十一

元 同恕 撰

五言古詩

焦潤之覺齋

民生天地間，厥初靡不一。二五相盪摩，厚薄迺陰陽。巧智覲，非分良心遠。淪失憂勞迷，所安性命推。甲乙焦卿何許來，袖有五禽術。一剖禍福源，恍若起沉疾。堂堂左山公，龍虎挾巨筆。扁榜豈漫然，深衷待君述。

讀考亭遺文

孔孟不可作誰哉繼其蹤寥寥千載餘梗莽嗟途窮善  
端根人心寒暑互始終於惟皇上帝篤生紫陽翁君父  
止仁慈臣子盡孝忠民彛煥星日諒不下禹功班班列  
言論萬古開盲聾茲焉儻可議嗚呼其孰從

皇甫固道允懷齋

玄運晝夜間九十餘萬里瞬息無停機神功妙資始聖  
學貴日新疊疊同不已千載一寸心窮達均衆美冰淵

保令終斯亦列星比寄謝齋中人師傳儻如此

淵明歸來圖

嗚呼靖節翁後世忠武侯出處雖事殊抱負同天游雲  
鶴斂奇翼還我松菊秋南山日在眼琴書可消憂千年  
長沙孫眉宇生氣浮朗詠傳雲篇邈矣追風流

虎溪圖

遠公廬阜居心境兩超絕紛紛任去留法眼槩一閱平  
生方外交陶陸人中傑高標脫世羈晤言契真悅相逢

苦無期相送那遽別區區虎溪巖不為兩公設舉手一  
適然長風振林樾

送蕭勤齋歸別業并序

維斗先生近營朱張邨別業以遂幽棲之志某也朴  
魯實賴提撕今遽舍之而去殊深悵惘謹綴俚言攀  
餞行李非敢為詩特以攄情素耳

世有萬里行舉杯載云別夫子即幽棲道路幾周折塊  
坐一念之中心忽如噎賢人出處間吾道從可決曷此

數來年神理遂將絕沒者永無望存者猶碗艱顧我蠢  
陋資學問復荒滅常時幸摳衣刮目際餘烈每恨聚散  
期倏若風花瞥況今成遠違相看動踰節死草乏吹噓  
寧能久霜雪百挽不得留踟躕五情熱再拜慎起居惟  
神相明哲他時策馬來龍門訪遺轍

東郭

東郭月初上靜院開暝色幽人淡無夢孤坐琴在膝露  
下氣更涼香逗心亦寂徘徊白雲意度此清景夕虧成

諒奚有物我俱自適曲終已忘形殘河渺窮碧

秋江晚霽圖

迢迢江上山渺渺天際浪晴霞散餘輝彩翠迷下上劃  
然林谷開灑落得物象秋風吹乾坤水石固異狀兩舟  
何許人超搖在清漾江山如此中發揮信高尚有懷宿  
昔深感激生悄愴胡為塵土腥耳目隔欣曠

遺安堂

安者人所趨危者人所避壤壤穹宇間趨避每相戾君

看伐冰家廝役猶深麗一朝位望傾往往無噍類天工  
豈禍人驕淫理必至何如畎畝身俯仰頗自遂春桑足  
裋襦秋禾飽饕餮墜雖暫勞子孫有長利非堂名遺  
安君諒識高義誰知千載餘復見襄陽耒嗣守嗟古難  
過庭皆令器請哦洲冰詩安危乃一致

題李之順山水

山水含清暉康樂詩言如謂此能娛人可以寄舒徐泰  
中山水窟清暉何時無熙熙復攘攘不暇相為娛畫史

妙經營尺素意有餘撫卷一慨然誰哉此茅廬

題陳閔人馬圖

兩馬誰所為人言此陳閔到今幅紙間氣與八駿爭絕  
藝不世有見者為嗟驚因知苦心學能留千載名

送雷季正之燕

飛花滿長安離情對罇酒持此鄭重杯飲我平生友夫  
子今名家風流靄闕右翰墨灑芳馨言論吐瓊玖三年  
鴻都遊英譽騰衆口儲端重文儒擢置在樞紐請告觀



慈幃程嚴復東首激揚吾弗能贈言愧野醜嗟哉方寸  
微紛然應萬有聲色蕩其前貨利餌其後毫釐失檢防  
駸駸入驅誘君實勇有餘抗志麗辰斗永誌精一傳肯  
使纖翳垢富貴非宿心事業期不朽慨彼莘野翁幡然  
謝畎畝

送劉民望尹安定

并序

鄉人劉君民望端厚秀敏讀書為吏卓卓輩行間削  
牘諸司陞掾行省蓋慎積致也延有紀號勅承務郎

尹奉先邵陽縣剛以摧姦柔以撫順百利具興一害必去民氣忻忻如登春臺歸還之日士民遮送至有涕泣者縣之耆儒丘訥軒為作去思頌今年秋以故官改延安之安定吾知安定之民爭迎道左又將如邵陽之送也諸公賦詩以華其行恕因敘而倡之為吏居百職能否隨用彰我我進賢冠獨得名循良民實國之本委寄尤慎詳輕車就熟路十倍君才長外戶夜不閉絃歌聲洋洋卓魯亦人耳可復同休光

感懷

蹠跣迺有年顏生痛天折氣數偶相遭巧智莫能越日  
食萬錢厨下筋無可啜鼓腹飯藜羹器器心自悅在彼  
寧有餘顧我亦可缺男兒生世間要當勵名節生與萬  
夫庸死為萬鬼列此懷誰與言臨風一長呷

為韓母題萱春堂

母德一世師母年宜所獨況乃晨昏間愉愉溫蘭玉盡  
挹天地春永介北堂福誰能絃且歌南陔久無續

秋宵步月圖

明月上東嶺徘徊照巖扉清興不可奈起行信委蛇王  
色淨林壑襟袖風披披一笑指絕景今夕當有詩

送日者焦潤之

鴻鵠搏青霄啁啾百鳥喧至人不世出誰與論乾坤堂  
堂管公明聲價動天門忍作攜手別愴怳將何言

送王文振嘉定錄判

悲風振高林寒烟慘寥廓行行重行行送子出西郭涕

淚兒女情執手感今昨中懷千萬端未言心已惡仕有時為貧聖賢蓋所諾僂俛敦夙好謀身諒非錯幸此須臾間相對且盡酌拳拳慎愛憎人情險於壑

哭族姪周道

仁義久廢講家門亦碌碌謂天生斯人微意殆有屬云胡未強仕百身不可贖二者痛無望淚珠劇困粟

送雷季正

鱗魴泊陵阜鴻鴈于木棲茲事免危困千載吾誰稽松

楸雨露感嚴命興晨雞懷哉陟岵歌白日忽已西

七言古詩

良夜

良夜沉沉天似水萬籟無風聲不起海上飛來白玉盤  
乾坤都在冰壺裏幽人雅志嗜絲桐境勝心清興難已  
琅然一曲發清商門外踉蹌舞山鬼夫君平日事絲綸  
三絕韋編妙入神欲攀天闕守九虎歸來甘作蓬蒿人  
胸中老氣蟠不下時託朱絃一陶寫高山流水少知音

白雪陽春無和者長安華屋填層城綺筵日日鳴秦箏  
淫哇聲盡衆人耳正聲淡泊有誰聽爭如袖却薰風手  
雲壑為家月為友可憐洒落卷中人憔悴紅塵今白首

喜雪和勤齋先生韻

夜窓蕭蕭風歷紙漸覺清光射眸子家僮遽報雪盈空  
曷意窮年有茲喜來年槁伏黃埃間朝結微陰暮還已  
城中嗷嗷十萬區豈獨私憂嗟百指朝廷邇日得賢相  
大沛嘉音湔舊滓天心還與聖心通頓使黎元恩澤被

平明策試尺許深籛蕩乾坤仍不止怒張獵隼恣憑陵  
凍雀求哀竟何恃神龍變化應巨量浩浩一事同遠邇  
虛齋坐久肩聳山亦有微漸生硯底徑呼歡伯為解嘲  
藜口莧腸今免死雲章忽自九空墮疾讀泠然欲冰齒  
唱酬絕倒昌黎公玉振金聲足條理追蹤騷裏良足歎  
蹢躅之技止於此

喜雪次郭方齋用東坡韻

陰風萬木無留葉一夕乾坤灑清雪培根養脉膏液濃



生意何嘗有中絕瑞光眩轉迷四圍大地渾沌平九折  
豈惟入眼駭觀新更喜燒腸飢火滅取琴按曲絃不柔  
呵筆書辭肘還裂沙沙窻紙碎作聲點點衣襟巧生纈  
龍公曾次有此奇人世囂塵宜不屑比年旱疫兩成灾  
性命忽如朝露瞥太和元氣行復常社老鄉翁聽渠說  
嗚呼有司公且明感應真如契磁鐵

賀姊壻程子益生男

乾坤元氣相推遷兒生乃在丁丑年蘭湯浴出紅錦縛

英物自匪庸兒肩頭顱嶢嶢峙寒玉眼波湛湛澄秋泉  
褰幃一笑萬事足快取桑弧蓬矢懸迺知積善有餘慶  
聖神方冊非徒然夫君門戶實天啓勲名累葉皆人賢  
卓哉河南二夫子道統遠接洙泗傳大經大法煥星日  
為我後學開冥玄俟兒起能讀遺編反躬厲行符若先  
人生所以貴似續政使不墜吾青氍毹為齷齪效爾外  
家阿兄輩會須墾此南山田

五言律詩

南詔殊俗圖

聖域無遐邇恢恢共此天殊音自宮羽異服亦纁玄五色占雲久三方恐我先從今更萬歲臣節誓終全

思述堂

先世堂堂業孫曾翼翼思勲名千載事忠孝百年期家慶栽培厚人才輩出奇須看孔惺氏廟鼎勒名時

邵周臣愈袁叔燦疾

術變由心得天將壽此民脉占微入髓藥效捷通神義

不千金顧仁迴四氣春良醫傳有種隨世在吾秦

潘母家訓圖

夫子哀長世孤雛濟大艱此心天敢負異日我何顏舊  
族風流在傳家素業還死生兩無憾高節照人間

李氏泖溪作

見說泖溪好幽居一付君水聲千古月山色四時雲爭  
席漁樵話投筇鷗鷺羣百年真受用有耳幾人聞

挽孟孝卿郎中

閭閻庠序日郁郁桂林枝文獻承家遠才猷用世奇清  
風留省幕厚德著刑司未究青雲業空餘薤露悲

再世通家好平生託契深別離纔境出消息遂淵沈談  
席從誰接歡盟可重尋長歌懷舊賦淚下不成音

房渭南移學

房簿今賢吏儒宮見設施改圖非得已善治本於斯構  
築勤三載觀瞻聳一時嗣音同好德尚不廢成規

王子宜八十

佳氣葱葱日先生笑舉觴衣冠瞻朴雅步履羨康彊福  
祿培基厚詩書種德香十分纔一耳彭壽慶方將

中秋對月

年年期此夜霽月少逢圓委照三更席飛光萬里天放  
歌聲激烈狎坐語聯翩遙憶緱山鶴吹笙定有仙

再賡前韻

今宵對佳月恰是九分圓露淨瓊瑤界星稀紺碧天桂  
香餘冉冉風袂欲翩翩樽酒從誰飲吾將起謫仙

送成學正

眉睫見吾子，勵齋吁此翁。  
性珠圓夜朗，德器妙春融。  
菽粟無奇味，參苓得久功。  
莫嗟今日用，試看百年中。

送李永言延安學正

學官開郡國，於職未為卑。  
風動絃歌俗，功成俎豆師。  
通才如子少，遠業不吾遲。  
笑貌均知德，期將荅聖時。

題穆郎中有慶堂

忠孝誰兼美，芬芳萃一身。  
冥冥唯自種，浩浩不私親。  
松

金定四庫全書  
卷十一  
柏慈幃壽芝蘭子舍春福川流更遠稱願到秦民

壽石仲彰母

風雨巢傾早栖栖母子俱人倫明大節義教得良圖丹  
桂雙枝好青松百尺孤今年眉壽酒盛事說西都

壽程甥忠

穎悟惟天畀溫淳自性成詩書新軌範冕舊家聲顧  
我非張舅知郎必陸甥進修當勉力萬里看鵬程

送王元膺



吳嶽鍾神秀森然氣不羣  
韜鈴東高閣詩禮策奇勲  
俛仰驚初見周旋勝所聞  
賦詩無傑思聊以寫悃勤

送薛君英管勾

才適清時用名為大相知  
檄書搜外府驛騎謁台司  
古學心藏妙今文舌吐奇  
鵠雛毛羽好更沐鳳凰池

新月

雲淨西南角冰痕印碧天  
漸看疑鏡破初上認鈎懸  
鴈底空成恨梅梢更可憐  
素娥還肯語借問幾時圓

雪次張彥清中丞韻

一色雲連日空花作陣來龍宮無寶藏人世有瑤臺  
淦氣潛消却天和剝挽迴閭閻笑相語酒禁又須開

挽張提舉

并序

保安張先生子載延祐中知河中府幕事陝西行臺  
聞其為宿學也假以掾史祿敦請居臺中為士屬講  
經已乃薦為儒學副提舉先生既受命悉心學政一  
以長育人才為務不數月絃音誦聲洋洋乎侯類教

行有漸而先生遽以疾終嗚呼惜哉旅食不能即葬  
遂藁殯近郊其子某往返經營者屢矣今年春始克  
護柩東歸不肖嘗辱禮接感念疇昔賦詩寫哀又以  
歎先生之有子也泰定改元春三月清明日書

舊學推淵博芹宮足表儀鱣魚方兆慶鵬鳥遽成悲燕  
社魂歸日秦闕泣送時有兒能大事天理不吾欺

博囉平章無欲齋

天德養純全人情戒頗偏振衣千仞表邁跡萬夫前玉

栗中涵潤金明外自堅危微傳聖學斯世有斯賢

送高御史遼陽都事

賸欲征衣挽才難自古然借籌行省幕來輟外臺賢  
造父六飛策由基百步弦未容賓席暖東閣聽招延

挽汪左丞

惠澤均千里威名蓋一時雷霆新耳目烟雨暗旌旗  
黔首嗟誰福皇天不憖遺寸心餘報國終古使人悲

送韓德卿

并序

韓君德卿吾秦佳士也篤志力學守義循禮受知勤齋先生書法尤得其妙處蓋駸駸乎鴈行矣今以夔府知事告別於某敢賦小詩以發途中一笑

勤翁門下士清廟器中珍筆問蘭亭陣徑尋槐市真美材儲用久健足發程新坐笑夔州了功成入幕賓

送王德威

萬里斯文轍堅車發轍初從容成四教勤苦出三餘韋傳吾家學楊侯外祖書錄君能挾此賢網不應疎

送趙彥卿

憲府三年吏聲華莫與班立談多士集止水一心閒  
急士方今日能君久故山惟應消息好時得慰衰顏

送李之晦

疏公名四海令器許璫璣騷雅曾中筆波瀾口角書薦  
庭金諾久雲路玉梯初努力加餐飯平生學有餘

送李凝仲縣尉

靈川古循吏卓魯未為優仲氏承家德初官佐縣侯寡

民無易視多盜有深憂黽勉栽培力千年一日秋

送王悅道同知

衡門能過我眉睫見尊公挺拔千林秀驍騰萬馬空英  
遊馳宿譽閭寄策新功袞袞雲霄路登車攬轡中

送李季孚

文明開聖治殷序接周庠鄭重師儒選丁寧俊造方久  
知閑德義且喜瞻辭章古學標三在修途貴自強

送李用中廉司掾

萬卷詩書業青燈夜雨秋下幃聯俊造提筆筵英游寶劍須真識明珠不暗投蜀霜森柏府賓主盡風流

送侯譯史之燕

師學傳天語關西獨有君乾坤新甲子龍虎舊風雲挺拔千林表超騰萬馬羣唯應好消息鄉里得先聞

贈臨潼李義士

福澤承家遠仁心得賦多萬人均若爾一室獨豐何不待朝廷勸能迴邑里和驪山千古地高義與嵯峨



贈王議卿義士

不作千金惜推恩古亦難饑寒多汝苦飽煖獨吾安  
原憲炊餘粟黔婁死有棺乾坤同父母皎皎此心丹

盆梅次張彥清中丞韻

生意分全地寒梢玉蕾紅林詩難著巧黃筆易為工  
瓶水留春到爐薰入夢同從今吾不恨長笛倚樓風  
渺渺江頭路相思金玉音故將盆裏種要作眼前吟  
瘦影依尊俎清芬奪麝沈歲寒真得友無復嘆商參

張氏園亭

艷艷春暉裏  
夭夭寸草心  
百年雙雪鬢  
一刻萬黃金  
水樂亭臺迥  
花雲几杖深  
有兒能祿養  
無厭數登臨

送靳御史之官南臺

憲府人材祿分司  
御史除雪消羣枉  
日霜立一賢  
初袖底澄清轡  
囊中慷慨書  
平生顏魯郡  
應有雨隨車

送馮仲潛之官成都

治世人文朗  
名家德種新  
深心期濟物  
正學本修身  
列

傳標循吏卷阿詠吉人潭潭徽政府滄海集珠珍

挽賈敏夫僉事

閩省才猷壯秦臺譽望專  
碁纔逢國手琴遽絕朱絃  
寫恨能無賦招魂漫有篇  
吁嗟清德在不復畏人傳

壽張太君

壽母春暉裏兒孫拜後先  
能成一家福尚友二南賢  
秋水南陽菊薰風玉井蓮  
長生嘉頌在百世儘芳傳

題薊國公射虎圖

父老談奇偉公乎凜若生弓強山可破獸猛葉如輕戶  
不春風閑人今落日行崔嵬北平石終恨不成名

題楊正臣廉使言章

表表人臣義堂堂御史名有言吾不敢懷愧若為情  
作浮雲蔽難藏白日明從來霜後柏蒼翠有餘榮

挽高用之總管

爽氣鍾珠秀長才富有為朱轡遺愛頌丹宸盛名知宿  
草迷萬里寒烟翳柏祠老成今已矣拊事重嗟咨

武縣尹士民悲送圖

絡繹道傍叟相逢各淚垂  
明君還棄我慈父欲依誰  
期月功能見三年政可知  
平生循吏傳班馬不吾欺

送族姪一飛

勤家念先叔遺澤在諸孫  
之子才尤美興宗事可論  
靜脩名始立卑牧道方尊  
老眼期須見高陽署里門

送姪孫畿往衡湘

順安先伯父麟鳳瑞吾宗  
素業當誰託曾孫乃汝逢  
孳

孳分善利惴惴事溫恭跬步無忘孝天心人欲從

送鄭器之雲南郎中

日南強聖域方漢尚中州省幕經營大人賢擢用優有才須幹國無意只封侯九折卬邾坂還君叱馭秋

題甘泉簿托音送行

三歲甘泉簿誰令有去思功繇勤力見心以至誠知今也誰專信民焉不忍欺霜松鬱柯葉當與歲寒期

壽雒翁八十 并序

涇水之陽有高年者姓雒氏世以善人稱於里中今年八十有二矣視明聽聰神充氣飽行不杖坐不歇如五六十許人蓋自壯歲有以長生久視之術授之者力行不懈人多以是為歸予固疑其未盡也及詢平生為子能孝為兄能友兩親遺言始生微物猶襲藏不棄篤實勤恭能保所受固有甚異於人者呼吸吐納云乎哉初度之朝賀者集門欲得予一言以佐子孫奉觴之勸於是敘而詩之既以美君又以為子

孫之勸也云爾

能事還能守真無忝所生松姿崑雪秀鶴步海雲輕宗  
族推純孝鄉閭敬老成如翁能幾見想像紫芝萌


挽樗巖馬廉訪

才臣中統舊有子獨公推學重宗藩選名高憲府知方  
欣仁者壽遽哭哲人萎不錫蒼生福人終造物疑  
太息將何及儒家失主盟經帷傳奧學文陣出奇兵安  
得消蒙吝猶期揖老成乾坤何歲月復此氣精英



偶詠

中宵一片月坐撫得齋琴雲歌鳳山遠海嘯龍波深清  
風凜毛髮零露霑衣襟天地誰先後悠然萬古心



渠菴集卷十一